

每週經課朗誦經文(巴克禮漢羅/教羅)2014/05/11

共同經課 - 1

使徒行傳二章四十二節~四十七節

42 常常專務使徒 ê 教示, saⁿ-kap 交陪、peh 餅、祈禱。43 眾人 lóng 驚惶;使徒 koh 行 choē-choē 奇事神蹟。
44 信 ê 人 lóng 聚集 tī 一所在, 所有 ê 物公家用; 45 koh 賣物產家業, 照 tak 人所欠用分 hō in。46 日日同心專務 tī 殿內, 也 tī 人家 peh 餅, 用歡喜誠實 ê 心來食, o-ló 上帝, 47 亦得 tiòh 眾百姓歡喜 in。主將得救 ê 人日日加添 hō in。

共同經課 - 2

詩篇二十三篇

1 大衛 ê 詩。1) 耶和華是我 ê 牧者, 我無欠缺。2 伊 hō 我倒 tī 青翠 ê 草埔; Chhoā 我 tī 安靜 ê 水邊。3 伊 hō 我 ê 靈魂精英; 為 tiòh 伊 ê 名, chhoā 我行義 ê 路。4 我雖然行過死蔭 ê 山谷, 亦 m̄ 驚災害; 因為你 kap 我 tī-teh; 你 ê thui, 你 ê 枋, 安慰我。5 Tī 我對敵 ê 面前, 你 kā 我排設筵席; 你用油抹我 ê 頭殼; 我 ê 杯滿出來。6 恩典 kap 慈悲的確 tè 我到一世人; 我 beh 永遠 khiā 起 tī 耶和華 ê 厝。

共同經課 - 3

彼得前書二章十九節~二十五節

19 因為人受冤枉, 但是為 tiòh 天良 òng 上帝來擔憂, 這是 thang o-ló。20 因為 lín 若犯罪受 phah 來忍受, 有甚麼可取? lín 若行好受苦來忍受, 這 tī 上帝 ê 面前是 thang o-ló。21 因為 lín 受召本是 beh án-ni; 因為基督也替 lín 受苦, 留模樣 hō lín, beh hō lín tè 伊 ê 腳步; 22 伊無犯罪, 嘴內無詭譎; 23 hō 人罵, 無倒罵人; 受苦無放 tiau; 獨獨將本身交託 hit-ê 照公義審判 ê; 24 伊 tī 柴裡親身擔當咱 ê 罪 tī 伊 ê 身軀, hō 咱 òng 罪 hit 面死 ê 人會 òng 義 chit 面來活; tùi 伊 ê 傷痕 lín 得 tiòh 醫好。25 因為 lín 前親像羊迷路; 但是 taⁿ 歸 tī lín 靈魂 ê 牧者, 也是監督。

共同經課 - 4

約翰福音十章一節~十節

1 我實實 kā lín 講, 入羊寮, 無 tùi hit-ê 門, 來 tùi 別所在 poāⁿ 過 ê, 是賊, 是強盜。2 Tùi 門入 ê, 是羊 ê 牧者。3 顧門 ê kā 伊開; 羊聽伊 ê 聲; 就隨名叫家己 ê 羊, chhoā in 出。4 已經將家己 ê 羊 lóng 放伊出去, 就做頭行, 羊亦 tè 伊; 因為認得伊 ê 聲。5 決斷無 tè 生份人, 就是閃避伊; 因為 boē 認得生份人 ê 聲。6 耶穌用 chit-ê 譬喻 kā in 講; in m̄ 知伊所 kā in 講 ê 是甚麼。7 所以耶穌 koh kā in 講, 我實實 kā lín 講, 我就是羊寮 ê 門。8 見若事先我來 ê 是賊, 是強盜; 但是羊無聽 in。9 我就是門; 若有 tùi 我入 ê, beh 得 tiòh 救, koh beh 出入, 亦 beh 得 tiòh 草料。10 賊來, 無 m̄ 是 ài 偷, ài thài, ài 滅無; 我來是 beh hō in 有活, koh 有豐盛。